

MEĐUNARODNA SARADNJA INSTITUTA I RAD SARADNIKA INSTITUTA U INOSTRANSTVU U TOKU AKADEMSKE 1966/1967. GODINE

Institut održava veze sa više naučnih ustanova u inostranstvu koje se bave izučavanjem istorije ili samo istorije radničkog pokreta i pokreta otpora. Kontaktiranje i saradnja sa ovim ustanovama i naučnim radnicima, zaposlenim u njima, odvija se putem razmjene publikacija, učestvovanjem na međunarodnim naučnim skupovima, studijskim putovanjima i sl.

U protekloj godini Institut je posjetilo više naučnih radnika iz inostranstva:

dr Jozef Hrozienčik, direktor Instituta za istoriju evropskih socijalističkih zemalja Slovačke akademije nauka, u okviru svog studijskog boravka u Jugoslaviji, posjetio je naš Institut 26. i 27. oktobra 1966. godine i interesovao se za organizaciju i način rada pojedinih službi u Institutu, posebno rada na hronologiji i bibliografiji;

delegacija Instituta marksizma-lenjinizma pri Centralnom komitetu Jedinjene socijalističke partije Njemačke (JSPNj) u sastavu: prof. dr Lothar Berthold, direktor, prof. dr Heindrich Gemkov, pomoćnik direktora i Fredy Sumph, saradnik Instituta — posjetila je naš Institut 14—16. decembra 1966. godine. Tom prilikom delegacija je vodila razgovor sa direktorom i nekim saradnicima Instituta i upoznala se sa programom, unutarnjom organizacijom i djelatnošću Instituta;

Mladen Kostov, upravnik i Asen Manov, viši arhivist Centralnog partijskog arhiva Instituta za istoriju Bugarske komunističke partije posjetili su Institut 22—23. maja 1967. godine. Za to vrijeme oni su se upoznali sa radom Arhiva Instituta i njegovim fondovima;

Karl Hädicke, pomoćnik upravnika i Heindrich Sommer, saradnik u biblioteci Instituta marksizma-lenjinizma pri CK JSPNj posjetili su Institut 17—18. septembra 1967. godine i tom prilikom upoznali se sa radom arhiva, biblioteke i grupe za dokumentaciju Instituta.

Posjeta dra Tibora Erényia, saradnika Instituta za istoriju partije pri Centralnom komitetu Mađarske socijalističke radničke partije (21—23. maja 1967. godine) i Elene Atanasove, saradnika Instituta za istoriju Bugarske akademije nauka (17. juli 1967. g.) imala je više istraživački karakter. Dr Erényi se interesirao za mogućnost istraživanja istorije radničkog pokreta u zemljama jugoistočne Evrope za vrijeme prvog svjetskog rata, a Atanasova za mogućnost istraživanja veza Georgi Dimitrova sa radničkim pokretom u Jugoslaviji u periodu između dva svjetska rata.

U istom razdoblju četiri saradnika Instituta su na stranim univerzitetima, institutima i arhivima, duže ili kraće vrijeme, proučavali ili istraživali naučne probleme koje obrađuju po programu Instituta.

Dževad Juzbašić, asistent, boravio je u Beču od oktobra 1965. do februara 1967. godine, gdje je, kao stipendista austrijske vlade, proučavao noviju istoriju Habsburške Monarhije. U okviru ove specijalizacije on je posvetio naročitu pažnju proučavanju austrougarske politike u Bosni i Hercegovini, posebno u odnosu na izgradnju željeznica u BiH od 1878—1914. godine. Izučavajući ovu problematiku, Dž. Juzbašić je radio u više bečkih arhiva (Haus-Hof und Staatsarchiv, Verwaltungsarchiv, Verkehrsarchiv, Kriegsarchiv).

Veselin Đuretić, asistent, kao stipendista Savjeta za naučni rad Bosne i Hercegovine, izučavao je organizaciju revolucionarne vlasti u periodu oktobarske socijalističke revolucije i građanskog rata u Rusiji. U tom cilju on je boravio u SSSR-u od 15. 9. 1966. do 15. 7. 1967. godine radeći na Irkutskom (3 mjeseca), Moskovskom (6 mjeseci) i Lenjingradskom državnom univerzitetu (1 mjesec).

Nikola Babić, naučni saradnik, boravio je u Institutu slavjanovedenija Akademije nauka SSSR-a u Moskvi (4. decembra 1966. do 4. januara 1967. godine), gdje se interesovao koliko i kako je sovjetska historiografija tretirala pitanje stava pojedinih socijaldemokratskih partija prema ratu i revoluciji početkom XX vijeka. U tom cilju N. Babić je vodio razgovore sa izvjesnim brojem historičara u Moskvi i Lenjingradu i izvršio uvid u dokumenta o ovoj problematici, koja se čuvaju u arhivu Instituta marksizma-lenjinizma u Moskvi, kao i u štampu ruske socijaldemokratije.

Enver Redžić, direktor Instituta, istražujući odnose i veze bosansko-hercegovačkih socijalista i austrijskih socijalista u periodu od prvog svjetskog rata, boravio je u prvoj polovini septembra 1967. godine u Međunarodnom institutu za socijalnu istoriju u Amsterdamu. Kao naročito interesantne za njegovu temu E. Redžić je istražio prepisku Karla Kautskog i Eduarda Bernsteina.

Takođe je E. Redžić učestvovao u radu III međunarodne konferencije historičara radničkog pokreta, održane u Lincu od 20—24. septembra 1967. godine u organizaciji radne grupe (Arbeitsgemeinschaft) za istoriju radničkog pokreta u Austriji. Na ovoj konferenciji, koja je bila posvećena objavljivanju izvora za istoriju radničkog pokreta i raspravi o nacionalnom pitanju i radničkom pokretu sa posebnim osvrtom na Austrougarsku Monarhiju, R. Redžić je dao prilog diskusiji na temu: Socijalna demokratija Austrije i pitanje Bosne.

Rasim HUREM